

# Akilerartarnermut suliaqarnermut atatillugu kommunit innuttaasunut kiffartuussinerat pillugu nalunaarut

Akilerartarnermi ingerlatsineq pillugu Inatsisartut inatsisaat nr. 11, 2. november 2006-imeersumi § 8 naapertorlugu aalajangersarneqarpoq:

## *Suliassat*

**§ 1.** Akileraaruseriffimmi akilerartarnermut suliaqarnermut tamarmiusumut suliassaqaqarfimmut innuttaasunit suliffeqarfinniillu ornigulluni saaffiginnissutitut atatillugu paasissutissiinermit ilitersuinernullu tunngassutillit kommunip suliassaralugit ingerlatarei. Kommunimi saaffiginnissutit allat assigalugit suliassat kommunimi ingerlatsivimmit ingerlanneqarsinnaapput, assersuutigalugu saaffiginnittarfimmit, innuttaasunik kiffartuussivimmit, inuit nalunaarsorsimaffiannit assigisaannilu.

*Imm.* 2. Kommunimi innuttaasut suliffeqarfimmi nunap immikkoortuani akileraaruseriffimmut attuumassuteqaqfigisaannut kommuni innersuussisarluunilu suleqateqarpoq. Saaffiginnissutit kommuninit allanit innuttaasunit suliffeqarfinniillu pisut, kommunip saaffigineqarnermini ikiorsiinermit suliarisarpai.

*Imm.* 3. Akilerartarnermut suliaqarnermut tunngatillugu suliaq kommunimi sumut inissinneqarnera aamma kommunip akileraarutitut tunngatillugu innuttaasunut kiffartuussiviani kina ulluinnarni akisussaasuunersoq pillugit kommunalbestyrelsiq nunap immikkoortuani akileraaruseriffik nalunaarfigisarpaa.

## *Ilitersuineq aamma paasissutissiineq kiisalu qarasaasiakkut aaqqiissutit*

**§ 2.** Akilerartarnermi suliaqarfimmi immersugassat, paasissutissiinermit atortussat il.il. kommunip tunniutissavai akileraaruseriffimmi nittartagaaniit atortussat kissaatigineqartut pissarsiarineqarnissai pillugit innuttaasunut suliffeqarfimmi kommunip ikiutissalluni.

**§ 3.** Akileraaruseriffimmut qarasaasiakkut kiffartuussinerit aamma akileraaruseriffimmut attaveqarnermi atortut atornissai pillugit, atugassaritineqartut saqqumittinneqarnerani sapinngisaq naapertorlugu kommunip innuttaasut suliffeqarfimmi ilitersussavai.

## *Skattekortimik atortunillu allanik allaganngortitsineq*

**§ 4.** Akileraaruseriffiup peqqusineratigut, kommuni skattekortimik atortunillu allanik innuttaasunut aamma suliffeqarfimmut allaganngortitsissaaq.

## *Apeqquaqatiniq il.il. ingerlatitseqqittarneq*

**§ 5.** Akileraartarnermi suliassaqaarfimmut tunngassuteqartunik §§ 1-4-mi suliassat taaneqartut avataaniittut pillugit saaffiginnissutit kommunip akileraaruseriffimmut ingerlateqqissavai.

*Imm. 2.* Imm. 1 naapertorlugu saaffiginnissutit sapinngisaq naapertorlugu ingerlaannaq ingerlateqqinneqarnissai kommunip neqeroorutigissavaa, taamaalilluni innuttaasooq imaluunniit suliffeqarfik akileraaruseriffimmit erniinnaartumik akissuteqarfigineqarniassammat. Innuttaasooq imaluunniit suliffeqarfik sinnerlugu kommunip akileraaruseriffik aperisinnaavaa imaluunniit innuttaasooq suliffeqarfilluunniit akileraaruseriffimmit attaveqarfigineqarnissaannik kommuni neqeroorsinnaavoq. Akileraartarnermi suliassaqaarfimmut tunngasunik saaffiginnissutit pillugit akileraaruseriffik kommunimut innersuussisinnaangilaq.

#### *Akileraaruseriffimmik suleqateqarneq*

**§ 6.** Illoqarfinni, nunap immikkoortuini akileraaruseriffimmik akileraaruseriffiup pilersitsiffigisimasaani, §§ 1-4-mi taaneqartut suliassat nunap immikkoortuini akileraaruseriffimmit suliarineqartarput. Illoqarfinni taakkunani kommuni innuttaasunik kiffartuussivimmik pilersitsisimappat, §§ 1-4-mi taaneqartut suliassanik suliarinninnissaq siunertaralugu akileraaruseriffik kommunimi inuttaliinermigut sulisoqartitsisinnaavoq.

*Imm. 2.* Illoqarfinni, nunap immikkoortuini akileraaruseriffimmik pilersitsiffiunngitsuni, akileraaruseriffiup akileraaruseriffimmut innuttaasut suliffeqarfillu attaveqarnerannut atugassanik attaveqarnermi atortunik, tassunga ilanngullugit qarasaasiakkut atortut akileraaruseriffiup atugassatut saqqumitissavai. Atortut kommunip allaffiani inissinneqassapput.

*Imm. 3.* Nunaqarfinni nalinginnaasumik attaveqarnermi atortut nunaqarfinni kiffartuussiviit allaffianniittut atorineqartarput.

*Imm. 4.* Akileraaruseriffiup attaveqarnermi atortuisa qarasaasiakkullu kiffartuussinerit atorineqarnerat pillugit akileraaruseriffiup kommuni ilisimatissavaa.

*Imm. 5.* Immersugassat, paasissutissiinermi atortut il.il. qarasaasiakkut pissarsiarineqarsinnaanngitsut akileraaruseriffiup kommunimut atugassanngortittarpai.

**§ 7.** Erseqqinnerusumik isumaqatigiissuteqarnikkut akileraaruseriffiup suliassanik allanik killilimmik suliaqarneq pillugu akileraaruseriffik kommunimut isumaqatigiissuteqarsinnaavoq.

#### *Aningaasaqarneq*

**§ 8.** Illoqarfinni, nunap immikkoortuini akileraaruseriffimmik pilersitsiffiunngitsuni, attaveqarnermut atortunik, qarasaasianut attaviliinermi assigisaanilu pilersitsinissamut ingerlatsinissamullu aningaasartuutit akileraaruseriffiup akilissavai.

*Imm. 2.* Immersuiffissanik, paasissutissiinermi atortunik il.il. kommunimut naqiterititsinermi nassiussinermilu aningaasartuutit akileraaruseriffiup akilissavai.

*Imm. 3.* Kommunini, nunap immikkoortuini akileraaruseriffimmik pilersitsiffiunngitsuni, §§ 1-5-imi taaneqartunik suliassanik suliarinninnermi akileraaruseriffik kommunimut aningaasanik nuussissaaq kingusinnerpaamik ulloq 30. juni. Akileraaruseriffiup aningaasat aalajangersarsinnaavai overassistentip ukiumut aningaasarsiai akissaatit nikerarneri kingulliit naapertorlugu tapeqanngitsut (SIK-mik isumaqatigiissut naapertorlugu) allaffissornermullu aningaasartuutinullu allanut 45,30 procentip annertoqqataanut tapeqartinneqartut tunngavigalugit, agguariaaseq una naapertorlugu:

1) kommunit 3.000-inik amerlanerusunilluunniit innuttallit 1,00 sulisoq,

- 2) kommunit 2.500-inik kisianni 3.000-it ataallugit innuttallit 0,90 sulisoq,
- 3) kommunit 2.000-inik kisianni 2.500-it ataallugit innuttallit 0,80 sulisoq,
- 4) kommunit 1.500-inik kisianni 2.000-it ataallugit innuttallit 0,70 sulisoq,
- 5) kommunit 1.000-inik kisianni 1.500-it ataallugit innuttallit 0,60 sulisoq.
- 6) kommunit 750-inik kisianni 1.000-it ataallugit innuttallit 0,50 sulisoq.
- 7) kommunit 200-inik kisianni 750-it ataallugit innuttallit 0,25 sulisoq.
- 8) kommunit 200-it ataallugit innuttallit 0,10 sulisoq.

*Imm. 4. § 7-imi taaneqartunik suliaqarnermut akissarsiaq kommunip akileraaruseriffullu akornanni isumaqatigiissuteqarnikkut aalajangersarneqassaaq. Minnerpaamik akunnerit suliffiusut amerlassusaat 45,30 procentimik tapilerlugit sulisup aningaasarsiaanut kommunip aningaasartuutai naapertorlugit akissarsiaqartitsisoqassaaq.*

#### *Atuutilernissaa*

**§ 9.** Nalunaarut ulloq 1. januar 2007-imi atuutilerpoq.

*Namminersornerullutik Oqartussat, ulloq 2. november 2006*

Josef Motzfeldt

/

Kaare Hagemann

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

